



**Sessione di l'Assemblea di Corsica**  
**U 30 di lugliu di u 2020**  
**Discorsu di u Presidente\***  
**Jean-Guy Talamoni**

Care colleghe, Cari colleghi,

Nanzu di principià, vogliu rende un umagiu à dui pueti chì si ne sò andati ùn hè tantu : Roccu Mambrini è Marcellu Acquaviva. Ùn sò più incù noi ma i so versi fermeranu è ribumberanu sempre in a nostra memoria.

\*\*\*

Sò parecchi anni avà chè no dumandemu a creazione di un centru ospitalieru universitariu, u CHU. Sta rivendicazione si ritrova per indettu in u nostru prugettu « Corsica 21 » publicatu in lu 2010.

Cù a crisa sanitaria chè no campemu, stu bisognu hè diventatu più chjaru per tutti. Sta dumanda hè diventata più pisiva è si manifesteghja oghje cù a messa in ballu di un cullettivu à prò di sta creazione è a pubblicazione in linea di una petizione firmata digià da più di 3400 persone. Vogliu salutà u Duttore Francescu Benedetti, u nostru collega, à l'origine di sta mossa oramai raghjunta da parechi altri professionali di a salute.

Per contu meiu, in a mo cuntribuzione à u « Ségur di a salute », aghju fattu sette pruposte chì puderebbenu migliurà u sistema di salute in Corsica, rendendu lu più efficace in tempu di crisa ma dinù in « tempu nurmale ». A creazione di un CHR-U è di un'Assistenza publica corsa ne face parte. A cunferenza di i presidenti s'hè addunita a settimana scorsa, cù parecchi attori di a salute, per definisce urientazione nove in stu duminiu. Si pò dì ch'ellu c'hè un accusentu largu cù a pruposta di creazione d'un CHU.

D'altronde, prupuneraghju dumane à a nostra Assemblea una muzione in stu sensu. Vogliù pricisà chì a creazione di un centru ospitalieru regionale serebbe una prima tappa versu u scopu finale : a creazione di un centru ospitalieru universitariu.

Nanzu di sviluppà, vogliu ramintà chì a salute hè un duvere è un drittu fundamentale. À l'istituzione, li tocca à avè tutti i mezi da ch'elle sianu capace à curà i malati. Cosa feremu di e cunniscenze è di e ricchezze, s'ell' ùn ghjovenu da curà l'umanu ? À i malati, ci tocca à assicurà li u drittu d'esse curatu. Cum'è ogni populu, i Corsi anu fattu di a salute a so prima primura. Eppure, in u nostru paese, stu sugettu piglia un sensu particolare per via di i deserti medicali, di l'infrastrutture chì vanu invichjendu, di a debbulezza di u sistema, di a mancanza di materiale... Ne hà fattu a prova a crisa di u Covid-19. Hà palisatu sta realtà. Eppure, ben ch'ella sia una cumpetenza di u Statu, avemu decisu

di dà ci di manu à prò di a salute perchè avemu a carica di l'interessi materiali è murali di u populu corsu.

Oghje, vulemu sprime a nostra vuluntà pulitica d'agisce di manera efficace.

Per contu nostru, una di e suluzione hè a creazione di un centru ospitalieru regionale universitariu.

Eramu troppu pochi per avè un Università ? Innò. Avà a sapemu. Allora, sapemu dinù ch'un simu micca troppu pochi per avè un CHU.

Eramu troppu metropulitani per avè un Università ? Innò. Avà a sapemu. Sapemu dinù ch'un ministru di a salute oppostu à a sfarenziatione ùn ci puderà ricusà u CHU.

Mancavamu troppu di professori per avè un Università ? Innò. Avà a sapemu. Sapemu dinù ch'un CHU puderà furmà i nostri giovani medichi, cumu avemu furmatu i nostri professori.

Cum'è l'educazione è a cunniscenza, a salute hè un dirittu, per i Corsi, cum'è per l'altri.

Creendu stu centru, feremu entre a salute corsa in u XXlu seculu, risponderemu di modu praticu à u dirittu di tutti à a salute.

A prima virtù serà di migliurà l'ufferta di cura in Corsica, sviluppendu la à u livellu tennicu è à u livellu di e competenze, è di favurizà l'accessu à i servizii medicali, puru i più specializati, fendu calà cusì a necessità d'andà nantu à u cuntinente francese per fà si curà.

C'hè dinù un interessu suciale è economicu per a Corsica.

Un centru ospitalieru universitariu permetterà un'ufferta locale di furmazione medica, è dunque un accessu più faciule, più direttu, à i mistieri di a salute per i nostri giovani. Si pò dinù imaginà, perchè micca, a pussibilità di furmà i professionali di a salute di i paesi vicini in lu Mediterraniu.

Puderemu ancu, in leia cù l'Università di Corsica Pasquale Paoli, sviluppà è strutturà un'attività di ricerca ospitalu-universitaria di altu livellu, in particolare nant'à prublematiche di salute specifiche à a Corsica. Ci vole à precisà ch'è a nostra Università travaglia digià nant'à certe patulugie ma dinù ch'è u so presidente è a so squadra di direzione sustenenu anch'elli u prugettu di creazione di un centru ospitalieru regionale è universitariu.

D'altronde, l'attrattività di e specialità medicale favurizerà u ritornu è a stallazione in Corsica di professionali corsi di a salute.

U CHU ripresenta infine un'uppurtunità per tutti i stabilimenti è i professionali, privati o publichi. Puderanu benefizià di u sustegnu di servizii di puntarecciu è sviluppà a so attività è e cuuperazione.

U CHU ripresenta una furtuna per a Corsica. Allora purtemu lu tutti insemi, stu prugettu.

À ringrazià vi.

\*Seul le prononcé fait foi

Contacts presse :

Julia Marchini – 06 03 66 94 80

Anne Martinetti-Squarcini – 06 07 05 94 90